

四庫全書

集部

欽定四庫全書

松泉集卷七

吏部尚書汪由敦撰

書

上徐大司空書

啟者滄溪張先生舊所草書院三記前冬已將寄往浙中因欲覓書家書就碑式寄去因循至今伏見部務殷繁未敢以請竊思書院奉有

御書後來不患湮沒但聞諸夫子書院之設本自

聖訓而今人但知其為大中丞書院

賜額

賜書中丞自請之耳使終無一言推明所自則無異於
前中丞之修書院者反若專有其美與善則稱君之義
異矣

行在寓齋想頗清暇謹繕原稿呈上或再加斟酌覓通
家中善書者書之寄交藩司上石庶來者得有所考共

喻此意耳更有請者張師於老夫子雖以暮年識面實則道義中第一知己山齋主席有始有終生蒙薦達歿卹遺孤朋友之倫於期為至其生平著述如春秋辨義一書實可不朽老夫子亦向所心許即其他古文詩稿雜著皆一生精力所聚藐諸孤在娘付託無人及今不為收錄恐穴鼠壁魚零落都盡太元五千文不得俟後世子雲矣昨四月間其家人來京知張師北上時囑其甥劉生經理家事今尚在其家乞商之靈臯托人就其

家抄錄副本江蘇楊藩司與張師有舊蓋亦留心斯道者或囑其給紙筆俾劉生倩人抄寫轉寄來京但得一副本便可不終放失至於論定發梓姑俟異日可耳又聞其家云歸櫬尚在殯所蓋師母之意欲待遺腹免身方卜舉葬心苦志堅思之哽咽念張師生平行義由敦輩晚列門徒未能盡悉方劉兩君弱冠稱交白首無間竊謂古塘宜為之狀靈臯宜誌諸幽而伐石以表墓門必得老夫子一言為重此郭有道碑文中郎可無愧色

者也二事皆滄溪先生千秋之托有待於後者由敦侍
役門牆痛不得為炙雞絮酒之行非敢謂此區區者足
報知已於九京義列在三分自當然不敢不盡心焉耳
伏惟矜察

答明史館某論史事書

兩辱手翰如接面談發到書俱已領悉當轉送兩相國
覆閱王本列傳聚數十輩之精華費數十年之心力後
來何能追躅萬一若存輕詆之見非愚則妄但就其中

如韓林兒四人為一傳張士誠四人為一傳似當以卷帙多寡而分非別有義例也去冬高安師面諭即謂韓郭不應同傳退而思之太祖實曾用龍鳳年號似不必為諱且用龍鳳年號稱宋後亦何損於太祖得天下之正今議其不當用可也以為不足存而刪之則事之非義者當槩刪耶似非所以傳信也昨因重費商量謬擬羣雄混合之說亦因王本韓郭既與徐陳同傳亦無不可與張方諸人同傳雖曰調停實仍舊貫今若以韓林

兒與羣雄同列而子興獨為一傳或與高安意允協蓋
滁陽封王立廟原與林兒不同亦有義例非敢摸稜也
統惟年伯裁定當初開館時姪不揣愚陋私有蠡說數
條中謂明代文苑人物蕪雜不倫潛溪一代宗工當為
弁冕而遵巖震川三數公附其後斯足增重藝林既知
所見之隘遂棄去不敢質諸宗匠及昨修傳時謬議文
臣佐命李劉並列遂析四先生一傳復用舊說實自愚
發之不敢諉過他人但愚意借以推崇文學而同事者

因而薄視潛溪則迹同而意乃相悖矣楊憲奸險小人王本以官爵列李善長傳後然人實不倫應否別附均候裁定劉宋傳當即擬贊稿呈削或俟閱章業兩傳後再酌合衆偏以成一足恃鴻鈞陶冶耳王稿視前人撰明書諸本不啻遠勝今若無所據依信筆增損則其行文疵謬頗少讀至終篇一無可議然但畧改文法益足形其淺陋惟有考證事實或有脫漏互異及前後例亂之處補其不逮庶為王氏功臣非獨以依樣葫蘆不足

仰塞

詔旨而苟為立異也但稗官野史胪說叢談無足徵信而實錄編年繫日事蹟釐然雖是非褒貶不足為憑而一人之出處及所建之言所任之事首尾具在明白無疑故查實錄以改原文視臆斷較有把握亦非不知叩頭乞哀實錄原有曲筆而一一墨守瞽趨也外間推崇王本太過遂謂不可增損今即以行文而論江陵傳自是神宗朝第一大傳而王稿竟就史料首輔傳刪節成

文其中描寫熱鬧處皆弇州筆弇州逞才使氣抑揚軒
輊之間往往過情平心觀之自見且私書不妨裝點而
乃據為信史即令弇州知之恐亦未免失笑神光以後
此類甚多非敢攻擊前輩因羣推王本耳食者多冀老
年伯主持斯可耳承手諭之殷率爾冗布統惟鑒察

與劉古塘書

違濶道範忽忽四更歲籥企仰之私殊不可言而未敢
以尺牘輕溷在右想長者不以疎畧為罪也晤孔起翁

伏審起居嘉勝以慰瞻馳憶錢塘官齋得數接對雖奉
教日淺而因滄溪師以得先生之人之學竊深嚮往焉
先生以文學茂材與同鄉四五君子特起江左雖困屈
患難顛沛侘傺而文章之名愈益暴著而不可掩海內
知名士不敢不以第一流相推朋友聲氣之盛數十年
來未能繼其後者今諸君相繼凋謝或羈困失志而先
生如魯靈光歸然獨存自恨有生之晚四五君子者多
不及見事滄溪師兩年師之歿已再暮矣如先生負物

望為後進表率而牽於館役復不能相從以盡識其言
論之指槩學問之源流引領南望良用歉然先師之葬
尚未有期然竊念人事不可知將以待遺孤之成立豈
歲月間事非所以妥先師之靈也比致書同學囑其相
約過滄溪啟之師母窀穸之資計遺田所入意尚易辦
裏事服勞弟子之職但皆寒苦為課徒所拘未知能了
此舉否念先師生平學行多可稱述由敦輩晚列門下
知焉未詳先生與為性命之交至久不揣冒昧願先生

排綴遺言遺事撰行狀一首銘而誌之幽請以屬靈臯
先生而伐石以表墓門則司空公知己之言足信今而
傳後先師之不亡惟三先生始終之疑皆所不辭也春
秋辨義已從他門生處錄訖至所遺詩古文聞前年喪
過金陵先生檢閱而弄之敢求抄一本見寄編輯開雕
固未可輕議而吾黨同志三數人自當各存一副墨以
備意外之虞要蘄不朽後世耳時文板存光裕堂書坊
昨見師姪九成上司空公書欲取而藏之家廟司空公

位太高隆尊而致札於書賈則非體轉囑當事則張皇
愚意得先生片言坊客無不奉命由敦辱先師之知最
厚且切在三之誼百未一報旅櫬南歸未能臨其喪去
年丁先慈之變匍匐星奔過淳湖未能枉道詣殯所一
哭今入都取道浙中思欲訪先生於白門手受遺書以
歸迫於時日又復不果每讀史傳見古人篤行有棄官
持服躬自負土廬墓終喪者慚惕痛迫不敢自比於人
況衰經餘生哀緒萬端此中耿耿又何以云哉遇便附

候不覺覩縷伏惟鑒察矜宥不宣

與族父老書

由敦賴祖先庥廕遭逢

聖明竊有祿秩頃復蒙

恩矜念給假旋里瞻掃塋兆因得與諸尊長伯仲握手
道舊迫於程限匆促首塗環視少時遊處年相若者肩
隨者悉成老翁且落落如辰星矣行念年已垂暮繼此
能扶杖復入里門殊不敢自必憶昔幼學之日讀宋錢

君倚義田記慨然興慕以謂士大夫身當其境必當以祖宗之心為心存卹族衆而自通籍以來荏苒三十餘年所志未逮非敢忘也亦非敢吝也慨自先太僕公而下枝葉凋謝先府君奮自幼孤以辛勤羈旅之餘督課不肖十齡負笈附外氏族人家塾年一十三粗知搦管布衣疏食僅免凍餒十九遊庠硯田自力廿六來京師束脯所入不充菽水踰壯偉玷科第供職詞林亦惟史館餐錢朝夕是給厥後游邀

知遇拔置卿貳俸入始豐而侍直 內廷出入扈從輿
馬僂僕裝帳薪芻公私酬應歲費不貲每家鄉人至為
言里中近狀日益窘迫未嘗不慙然負疚思欲効升斗
之助而限於力有不贍此來都門者所共知也此年受
恩逾厚

賜賚優渥兒子亦叨列曹郎食太倉粟然服食資用所
為自奉計者弗求精饍中饋米鹽菹醢之細內子尚躬
操之未嘗求田問舍冀自封殖為後人地子弟深以襄

馬飲博聲伎為戒此亦都門相聚者所共見也茲荷

寵命得攜諸子賁

綸誥捧 奎章服章服奠饋祠宇下重勞諸父老迂勞

間閑遠近親串翕集歡慰榮忝過分彌增惶惕戚黨中
困乏者既隨輕重調之顧焦釜沃膏涸可立待抱甕一
溉何救曄乾思人生日用百需不容缺一而婚喪為大
當先其重者急者因解橐中裝遞年所餘俸

賜及親友贈餉適得千金敬以輸之祠會屬家季宇秀

經理歲收什一之息以備婚喪之用會名思益者本
君恩以敦族誼分所當然而繼長增高俟諸異日或能
擴充增益養老字幼孤孀有廩寒士膏火有資在此時
誠未暇及而姑存其意即以是為平地之一簣焉可已
敢具述素懷及所以遲至今日且有俟於將來者布之
尊長伯仲弟姪共鑒愚意

復趙秋谷先生啟

恭惟太老夫子昭代錢鏗熙朝聃史七十載靈光夙望

領袖蓬瀛三千首太傅清詩平章風月仰藝林之山斗

名壓崔王溯講席於河汾業傳房杜

予座師陽城田文端公先生甲子山

右所拔士

滄浪子美縱觴詠於名區安樂堯夫作神仙於平

地

某

山陬末學牆面鯁生竊從童稚之初已有天人之

訝一編鼓枹不覺情移數則譚龍能無目眩詎意辦香

所奉終歸陶鑄之餘敢云衣鉢相承不忝淵源所自鄧

林持斧喜得豫章冀野空羣顧來驥子第以征軺之促

駕未遑廣座之摠衣三刺

詞林後輩初謁前輩例投三刺

未修寸箋莫

展考詞林之掌故悚仄方深問記室之典籤瞻依彌切
猥辱朶雲之下賁慰茲積歲之馳神世叔學本青箱才
高黃絹三年唱第直探上苑之花此日循陔奚羨當階
之藥子南辰典試山左公仲子慶登賢
清頃來京試內閣中書未遇故云敬因歸侍附候
興居雲白山青望龍門其尚遠松貞鶴健聽鸞嘯以何
期憑楮申懷臨池瞻悚

松泉集卷七

欽定四庫全書

集部
松泉集卷八至十

主事_臣汪彥博覆勘

武英殿纂纂修編修_臣吳鼎雯

欽定四庫全書

松泉集卷八

吏部尚書汪由敦撰

序一

大駕鹵簿圖記序

在昔軒轅肇建車旂亦越虞周典章大備鹵簿之名則沿於西漢所稱千乘萬騎屬車九九其螭略毼綏郵偁容裔之盛槩可想見自時厯後代有損益所以隆典祀

重朝章明等威彰物采非特為觀視之美而已我
皇上躬上聖之姿當制作之會敬

天尊

祖寅誌明裡崇煥

郊壇釐定祭器稽古成憲禮備樂彰更

念法物之駕國朝參用前代舊式視昔特為簡省

制詔有司博考成規丕昭鉅典一器一名必本之於經
參之於史驗之物象徵之度數綜往古之豐儀折衷以

皇朝之隆軌品章儀具文質得中更定大駕鹵簿為法
駕鹵簿行駕鹵簿為鑾駕鹵簿行幸儀仗為騎駕鹵簿
合三者為大駕鹵簿

南郊用之以乾隆十有三年冬至

大祀南郊乘御伊始

命內苑供奉諸臣圖寫裝潢各成巨帙復合繪

南郊大駕鹵簿橫卷凡輦輅鑾和旗旗戈戟旌幢麾蓋
之設羽儀導從摯御環衛章服車騎之容莫不臚於緡

素傳以丹青臣承

命為之記竊惟蔚宗始志車服江左備圖鹵簿至宋而
景德天聖屢圖仗衛延祐一圖尚藏祕府臣侍直之
次得蒙

賜觀然開寶大駕多至萬有一千餘人其後乃增至二
萬餘人過於繁縟則著大觀而示尊極誠莫盛於
日謹稽首颺言卷端而件繫其名物人數如左

丙辰山東鄉試錄序

國家重熙累洽聲教覃敷德澤涵濡人文炳蔚我
皇上乘乾建極協和萬邦宵旰孜孜勤思繼序

念治天下以得賢才為本務當

世宗憲皇帝建元之初特開鄉會恩科樂育賢才

德意優厚爰稽成憲誕布

新恩乃以乾隆元年秋八月舉行直省鄉試禮臣以次

列名上請

臣由敦奉

命偕中允

臣

彭啟豐典山東試事伏念

臣

材質庸陋荷

蒙

世宗憲皇帝拔置詞林備員 講幄再與分校皆出

特恩恭遇

皇上龍飛御宇擢授京卿今春分校禮闈疊荷

殊施涓埃莫報茲復畀以掄才重任拜

命悚惶感懼交集惟澡雪身心殫竭精力仰副籲俊作

人至意以無負任使既星馳抵境局錡棘闡臣由敦偕

臣啟豐率同考官知縣臣毛邑等齋祓誓神共矢精白

進督學

臣

李光燠所錄士一萬三百有奇三試之晨夕

摻採商校甲乙得士九十六人貢成均者十七人謹錄
文二十二篇恭呈

御覽

臣

得颺言簡端

臣

竊惟教術之興聚天下英雋於

庠序之地三年大比甄其尤異者登之賢書士之經明
行修學有根柢者得由是以升於廟廊上之儲公卿大
夫之選次亦分庶司百執事之用國家禮樂兵刑田賦
學校之職業民生之休戚政治之張弛將於斯人焉是

寄夫是以始則董以師儒限以程試教之若是其詳也
舉於鄉第於春官臨軒而策之取之若是其周也授之
以政委之以社稷民人用之若是其重也士之與是選
者歌鹿鳴而薦以嘉賓不與則修業蒞時以待取迄不
得與則槁項黃馘而老於牖下故凡上之所為興賢育
才共圖治理與下之懷文抱質冀効尺寸以自見於當
世者皆決於一日之遇而司衡鑒者實職其柄可不謂
重且難歟仰惟

皇上聰明天亶聖學高深雲漢昭同德洋恩溥肇舉闢
門之盛興擴舊額而增益之教育之方衡文之道與
夫學術之所宗尚為文之所取則

訓諭諄復至再至三殷殷然思拔真才以裨實用盖當
彙進之始即以遠者大者期之臣寅奉簡書維繹

聖訓寤寐服膺和衷詳審期得端良修潔閎偉博達之
材收實效於異日去取之際盖兢兢焉山左故鄒魯之
地先聖先賢宅里相望遺德餘澤沾被無窮泰山之高

東海之遠經以清濟帶以黃河扶輿蜿蜒靈秀萃聚風
會居南北之中重以比歲屢豐民氣和樂士得從容絃
誦游息於詩書研席之間而適逢千載一時之嘉會是
以鼓舞奮興爭自濯磨以永棫樸菁莪之雅化其為文
多疏達而安舒郁郁彬彬行墨之間吐露光穎其翹然
拔萃者亦庶幾乎能和其聲以鳴 國家之盛 臣雖才
識所限於衡鑒之重且難者隕越是懼而恭遇

曠典韋得襄事名區觀衆才之興異日或能効尺寸以

裨益政治仰稱

聖天子旁求之實意

微臣

得藉手以酬

高厚於萬一惶悚之次有餘榮焉謹序

辛酉順天武鄉試錄序

伏惟

皇上文德昭明武威赫濯光被四表俊民用章三歲大
比舉膠庠之士興其賢能薦名於天府肆韜鈴嫺決
拾者制科與儒生埒凡以

加意作人示無畸重典至鉅也乾隆六年順天武鄉試
屆期

特命領侍衛內大臣工部尚書信勇公

臣

哈達哈協辦

內閣大學士事禮部尚書

臣

三泰都統

臣

瑚琳

臣

永興

校別弓馬技勇拔其尤者列好字號暨諸及格之士合
千八百餘人進而試以論策

特旨以

臣

由敦偕編修

臣

秦蕙田司其事伏念

臣

庸陋

謏材荷蒙

聖恩簡侍 內廷

教誨成全屢加優擢叨佐中樞仰戴

高深隕越是懼恭承

恩命彌切悚惶爰即日入闈虔恪將事維時監臨則府

尹臣蔣丙等各董厥職臣偕臣蕙田暨同考官員外郎

臣鄒士隨等矢公矢慎悉心甄校榜發取士如額例得

錄文三篇恭呈

御覽臣以職當颺言簡端竊惟籲俊之典至 國朝而

大備卽以武途論內則豐沛之華胄入備宿衛出領節旄外而營伍之校弁居固封守行待徵發往往奮跡戎行建牙分閫膺封疆之寄乃至郡國秀民隸名黌序更得與科目之榮起自草茅疎賤進而參鷖冠豹尾之班儲將佐之上選蓋

聖朝樂育人材培養至深且厚恢網羅以徠髦士其途之寬而待之重也如此

聖天子神明英武撫重熙累洽之景運裕制治保邦之

遠謨

大閱於南苑肄師律馬

大獵於塞外簡軍實焉

臣

忝預扈從之末伏覩我

皇上躬屬橐鞬均勞士卒環衛暫御羽林欣飛心膂孚而臂指使

六御所經士馬之優嫺邊疆之寧謐與夫名藩部曲之輸誠戴德踴躍用命赫然駕三代盛王而上岐陽甫草殆不足方用丕昭克詰戎兵事事有備之至計至樞政

所掌簡拔將弁自列校以上悉引

見殿墀

親臨而授之以任日多至數十人盛暑祁寒未嘗少間
或以勞或以勇輒記名以示優異夫當武備修明之日
而旁招俊乂鉅細弗遺宜多士之于焉爭自濯磨以
應闢門之盛典况邦畿三輔近

日月之光華涵濡德澤視列省為最先而幽薊燕趙之
都雄勁秉於天性干城腹心之彥庶幾其在是與茲之

所錄取諸騎射技勇之優者蓋十之九記曰所貴乎勇敢强有力者用之於戰勝則無敵用之於禮義則順治外無敵內順治此之謂盛德聖王之貴勇敢强有力者如此也諸生既以勇敢强有力自表見復能角勝於文藝利見 昌期異日効奔走樹勲猷仰副掄材之

德意

臣

得藉衡鑑之役咏兔置歌棧樸實有厚幸焉謹

序

壬戌會試錄後序

聖天子觀人文以化成天下興賢育才聲教四訖籲俊
賓興之典以時舉行乾隆七年歲在壬戌貢士之集禮
部者五千餘人

皇上特命大學士伯臣鄂爾泰尚書臣劉吳龍主試事

臣由敦偕副都御史臣仲永檀副馬既竣事得士如

欽定之額循例錄文二十二篇恭進

御覽臣竊惟國家旁招俊乂布列庶位進士實為高

選是故甄於庠序貢於鄉會於春官程之以三試嚴之

以糊名易書與是選者

臨軒而親策之最其甲乙而授之職凡為是委曲繁重以肅登進之途者非故為難也重其選則取之不得不嚴取之嚴則辨之不得不審夫將起草茅而榮以爵祿政事之是圖民生休戚之是寄安得而不難諸安得而不慎諸承是役者上以念

聖朝作人之德化如其厚也求才如其誠也異日之任用如是其優也下以念多士之踴躍功名思挾所

有以自效又如是其迫也斤斤於去取之際毫釐之未
嫌則仰無以副

簡任而俯無以對多士且臣聞之文章闕乎氣運持風
會於全盛之日視起衰為尤難光嶽氣完人才輩出智
能瓌異之士百出其心思才力以角一日之長而或橫
溢而不衷於度或尋虛逐微而不當於理其新可喜其
怪可愕為所眩而不知察慕效者以是為說遇之捷徑
旁驚而不可止偽體流傳經術之蠹也風會所趨歸其

責於衡鑒之不審其奚所辭咎我

列祖教澤涵濡重熙累洽

聖天子建中和之極金聲而玉振之慶雲在霄萬物五
色郁郁乎文明全盛之會倬彼雲漢昭回於天周文公
所為歌棧樸也藹藹王多吉士維君子使媚於天子召
康公所為頌卷阿也求賢用吉士用勸相我國家其
道在慎持之而已臣幸從二三臣後黽勉將事於所謂
難之難慎之慎者竊兢兢焉錄成敬以綴於簡末

甲子順天鄉試錄序

皇上御極之九年秋八月鄉試屆期

特命

臣

由敦偕祭酒

臣

崔紀典順天試事於時提督學

政

臣

趙大鯨所錄士及太學諸生待試者萬人

聖天子慎重科目務得真才

申諭諄切

遣近侍大臣監視搜檢外場積弊廓清淨盡爰局院而
三試之糊名易書達於內簾者七千餘卷

臣

等率同考

官臣觀保等十有八人悉心披閱定正榜二百四十七人副榜五十四人既撤棘擇其文合義法者二十二篇遵例刻錄恭呈

御覽

臣

以職當颺言簡端竊惟國家敷求俊彥以備

公卿有司百執事之選所以取之者文也而所取則人也宋蘇軾有言得入之道在於知人知人之法在於責實唐虞之世數納以言成周選士造士崇四術立四教而賓興則兼六藝今科舉之制約之於五經四子之書

使求聖賢之精蘊束之以制藝使就先正之規矩繩墨
歷試之論表判策使究心於古今治忽之故文章體製
之殊其立法也詳以密而待士也重以周夫果沉潛於
五經四子之微言奧義則理無不明神明於先正大家
之立言軌則則文無不正考之往古驗之當今舉凡禮
樂兵農因革損益之宜一一講求其所以得失之要則
識無不到而又研練聲律含英咀華以儲經綸黼黻之
具豈非所謂元元本本大雅宏通之材可以應旁求之

典而無所愧此制科之初意所由人材輩出而文風亦
蒸蒸日上與唐虞成周育賢造士之方古今一揆也然
若是者非謏聞勦說可襲取而偉致也必體之以實心
克之以實學而以其所得之實理發而為明白正大之
文異日列於庶位斯以有實政而國家收得人之實
效歐陽修曰古之取士者上下交相待以成其美夫立
法之詳以密固深懲夫浮游不根者之襲取弋獲妨正
士登進之途而士習由以日隳耳襲取弋獲之徑塞而

魁閣寬通之士翹然得以自見其平居為己之功經世之學至是始得抒寫其蘊蓄以待有司之衡量不然嘉穀之求而稊稗之刈璠璣之珍而燕石之襲待之愈厚而自待愈輕幾何其不為制科之累歟懲創而作新之所以重勞

翼命也

臣

遭逢

盛際屢典文衡夙夜兢兢思所以仰

副

聖主樂育甄陶之至意亦惟是責實之見由其文以覘

其人庶幾拔十得五遴真才以稱他日之任使顧學誦
識陋雖敬慎蒐擇而錄者或未能盡當抑者或未能無
遺是則臣所深愧也夫且深懼也夫謹序

庚午順天鄉試錄序

皇上御極之十五秋畿內賓興

特命臣

由敦偕臣

嵩壽典其事進學政臣

呂熾

所錄士

及太學諸生待試者八千餘人臣

等

率同考官侍講學

士臣

蔡揚宗等十有七人盟心研閱既歲事得士如額

擇其文合義法者二十篇刻錄恭呈

御覽

臣

以職當颺言簡端竊惟文章之道所以發揮六

經義蘊紹聖賢既往之傳開天地日新之運其得之心而應之手者人品之邪正操行之高下如以鑑取形無不呈露何也心術之端流溢於楮墨而不能揜也粵自唐宋元明以來最重制舉本朝因其制而周防尤慎我

皇上躬上聖之資陶範唐虞文思光被

詔舉經明行修之士以資

顧問鄉試屆期

特頒諭旨遏奔競戒黃緣入闈之次

專命近臣嚴慎搜檢凡以立法詳則真才可得始進端則科名足重而於文章心術之源流所以去華而存實革薄而從忠者要歸於清真雅正臣出入

禁闈恭承

睿訓至再至三謬被

恩榮屢司文柄何敢不虛懷甄別以仰副

聖心於萬一夫糊名易書之中欲求真士苟非平心靜
氣操繩墨以嚴其去取則浮華詭激俱得徼倖一時燕
石楮葉之辨所關甚鉅肥濁者不清而淺薄非清也浮
艷者亂真而枯寂庸鈍亦非真也山泉始達雖涓涓細
流瑩徹可鑑無纖毫塵翳其源清也陽和所蒸萬卉競
發林木藥草真香生色天然可愛其氣真也人之神清
則能窮義理而不為物欲所蔽氣真則能達事變而不

為私意所淆究其本則清者治心之功而真者立誠之
效文本心以成聲相士者即因文以辨志繩尺恒斤斤
焉舍是則偽體之當別裁而矜囂驚弱之不容雜進者
耳茲之所錄雖不敢謂悉有合於雅正之選要必光明
洞達詞約理舉冀得清明篤實純粹之士以應旁求之
大典而備異日楨榦之用夫 京師首善之地風聲所
播海內喁然多士之懷文被質各正其心術以待

聖天子特達之知遇者輻輳竝進于于焉不可勝舉以

臣之愚所藉手以報作人之盛者惟服膺

聖訓以為標準顧學識謏陋心有餘而力不逮恐所收
不必盡佳而所遺不必盡劣也是則臣所夙夜靡寧者
夫謹序

松泉集卷八

欽定四庫全書

松泉集卷九

吏部尚書汪由敦撰

序二

榕村文粹序

余以丁酉春從蝶園徐公來京師奉公教杜門不出交
一人安溪李文貞公時以文章經學倡後進登其門者
雖寒峻弗拒又與蝶園公雅故然余亦未往一見也庚

子夏文貞公薨乃稍從友人處得公古文雜著若干篇
手錄為三帙嘗以未得公全集為恨後四年甲辰與公
孫立侯同舉進士又四年公全集刻成立侯以貽余蓋
文多余所錄者幾再倍既受而讀之復檢予所錄則文
之正大雅馴有功經學者咸在乃以知余之所錄固未
為少也夫文之傳不在多固有傳之多不如其少者蓋
愛其文而錄之者嘗出於少而孝子慈孫之哀而集之
則惟患其不多夫孝子慈孫之愛其親豈顧不如愛其

文者之為愛歟然孝子慈孫哀集之多與愛其文者之
出於少孰得孰失必有能辨之者矣余雖不足以定公
文而既得公全集以釋向者之憾且喜所錄雖不多而
公文之粹者固未或遺也題之曰榕村文粹而藏之於
家

香樹軒詩集序

少司寇柘南錢先生以所著香樹軒詩初集若干卷授
剗劂由敦奉教日久嘗屬為之序刻垂成趣序益亟為

歷數先世遺集序之皆當代名人由敦益惶恐謝而先生敦索不已當康熙丁酉由敦初至京師先生以五經名孝廉噪都下議論颺舉奕奕如神仙中人雍正甲辰由敦選庶吉士先生已前三年入館從修後進禮追儻居比舍時過從益密後同官春坊同侍

起居注由敦荷

今皇帝簡直

內廷先生亦已先入 直至今十餘年晨夕同出入又

同事秋官六寒暑間得叩涉端緒先生早歲稱詩時海
內二三鉅公以唐音宋調樹壇坫赤幟先生天才踔厲
杼軸不名一家顧選言命章往往凌轢三謝江鮑吐屬
名雋風力道上無一語蹈時蹊中年遭逢盛遇敷歷
中外持節所至若宣諭陝右度闕隴竝絕塞荒徼衡校
湖沅視學畿輔再典江右鄉試公餘游覽紀行抒懷贈
答篇什益富汪洋渾浩不可端倪如宿將御百萬師衡
軸鳥蛇奇正莫測不事古兵法而神明自合又如長江

波濤喬嶽雲雨起伏變滅觀者目眩神悚每直廬輻集
公私題詠多出譚笑之餘屬草未竟輒爭就搜觀造語
必創獲出意表 禁中曲讌給筆扎聯句人占名不過
二三韻由敦嘗竝案見先生伸紙預拈強韻排警句比
散未出者率數倍今春扈從

南巡迴蹕登金山奉

命偕節相高公詳定試卷夜半竣事由敦急索舟渡江
而先生赴高公約即事用東坡潭字韻成長篇詰朝書

素卷見示居恒酬應全集縑楮充几榻中夜難燭呵凍
雨汗不自已而其他嗜好亦未能悉屏先生處之沛然
嘗自詫連數夕達旦未嘗有倦意論者亦以是推先生
天才而先生殊異絕人顧不在此比定詩集及門士或
效忠為爭友刪削至十二三不止先生竟割愛從之其
通懷下善又如此間竊論先生於詩興會佳師法古性
情摯效之者盡力奔逐不能得一二竊情如由敦日以
先生自箴砭迄如駑足之追天驥用述平生所企慕弗

金匱口月全書
建者弁之庶讀者有以識先生之真

王紹曾遺詩序

文登令王君虞音將刻其亡弟紹曾之詩張君龍雲為請序於方先生靈臯先生辭之不得則持其詩諗予曰吾向者不為人作序其人固以請則屬之吾友若青浦劉氏大山上元劉氏月三子之師高淳張氏彞嘆皆嘗緣吾意以序人詩子其毋辭予聞之序者序所以作之意耳吾未嘗與紹曾游其所以作吾不得而知也即詩

亦不及見其全先生徇龍雲之意以屬余余復徇先生
意而為之序得毋戾於古乎雖然兄不忍死其弟而冀
其詩之有傳於後為友者不忍死其友而亟為之請此
其意於古為近先生之終與之者或以是若震先生之
名而託以為重則予不能與前數君子者竝序其可以
已矣夫

唐衢尊集序

今年春奉

命分校禮闈得唐子衢尊卷其制義老潔不為曼詞表
判論集之文應律合格音和而節諧亟薦諸總裁曰此
湖南傑出才也總裁相顧然余言比撤棘知果辰沅間
老儒晉江陳謙季先生甲辰典試所得士其謝表嘗刻
錄進

御先生與余遇亦亟稱之未幾

詔分諸進士赴鄰省布政使按察使學習政事衢尊得
陝西瀕行出所為詩古文經晉江先生評次者請序於

余先生許其才氣卓越工力深到余於試義知衢尊必
工於詩古文而乃今得見其金盃自喜不謬且歎先生
所許之為知言也顧衢尊不以學老文富自多而抑然
善下自以生長僻遠不得早從先生長者游恢擴見聞
發擴才力為未慊夫以衢尊之才令得資燕函粵縛之
利枕藉風騷馳騁大雅或簞承明著作之廷盡採藻摘
華之用所就當不止此然處黔盧左陋徭黎錯跡之鄉
而奮然思問道於古人斯其才固已奇矣垂老一第足

自慰焉而請益之意殷殷不已此其為傑出才也關中
名勝地多漢唐古蹟名人學士題詠在焉衢尊所以開
擴聞見發摠才力者吾不能量其所至即以其殷殷請
益之意施諸刀筆會計之間又以信授之以政之恢乎
有餘地而諸大吏皆許衢尊為傑出才不啻余與晉江
先生也

姚侍御新體詩序

姚侍御先生樂府古今體若干卷所徵用皆元明以來

事實因自題曰新體詩蓋先生嘗纂集元明事類一書
自紀傳志集野史雜錄詩文小說無不搜覽薈萃既被
薦纂修明史益得縱觀十四朝實錄於有明之朝章國
故精熟貫穿源流井井旁及諸家志乘名賢畸士之往
蹟叢編脞錄殫見而洽聞因以其所得者發之於詩每
一篇出援据或數十條無一字無來歷即前代故實亦
必取元明人所經用不欲欺人以所不知稍自假借如
此余受而讀之竊嘆夫學因故而得新世閱新而成故

今之所見為故者固向之所為新更閱數千百年而新者又故矣吾因向之所為故者而知故之必出於新則何新不可成故而顧執夫向之所謂故者曰若者秦若者漢匪是則弗道是烏知夫秦漢之人生於今視元明猶周秦耶且先生不自為新而必元明之故是求是亦猶秦漢人必資於周秦所謂因故得新而新必成故耳由是更千百年而故與新日衍於無窮詩亦與為無窮此先生所為有取於新之義而自為一體也先生詩故

長於隸事曩所賦類林新咏百餘篇在

聖祖仁皇帝時曾經奏

御備

乙夜之覽南陽西河諸前輩亟稱其淹通博洽鼓吹藝苑沾溉至今今自通籍以來纂述日益多聞見日益廣故所為詩出之若不經意而覆按故籍雖博極者不能徧舉其辭事所從出然非醞釀之富用心與力之勤且久自然流露於聲韻之間雖欲勉強掇拾效為之而有

金史四庫全書
卷九
所不能也然則先生之所為新者實有所自得而不恃
夫辭事之新以為新讀者毋眩其體而徒求之辭事焉
則於學詩之道悠然而有會矣

李魯膏補雲堂集序

嘉魚楚名邑也大江東流白雲高揭清淑所鍾代產宏
覽達識之士唐宋以往不可殫述矣有明一代若荆湖
太清正希魚山諸公節義文章烜赫宇內邇來漸洽風
教捷南宮者肩駢踵接壬戌春闈尹生南峯咸進士來

謁為予言其師李魯膏先生博學績文工著述且出其
所著補雲堂集求為之序夫自有文字至今作者代不
乏人當其伸紙奮筆洋洋纚纚意氣凌厲前無古人而
淘之汰之姓名俱歸泯滅歐陽公所謂草木榮華之飄
風鳥獸好音之過耳者殆不知凡幾是皆極彫鏤纂組
之工畢一生之能事以幾一日之傳而不可得更奚論
夫勦襲攬撫矜陳言為創獲與夫僻澀纖瑣牛鬼蛇神
者流哉

聖天子文思光被舉博學鴻詞之科海內雅才萃於館閣蔚然麟鳳之相章鏘然韶濩之競奏以李君之才令得登承明著作之廷摘華拔藻所就當不止此而老於孝廉司鐸黌舍由是觀之草茅之士韋生右文極盛之時而遭逢不偶為網羅所不及者可勝道哉然有如尹生者敬奉師言汲汲乎表章之恐後然則士有才患不能充之以學學患不能工於文文患不足以傳世而行遠苟績學工文足以自通於後其見知於當世有不藉

名位而顯者遇不遇舉無足計區區弁首之言又烏能
為作者輕重耶余重尹生請率為之序文之所造讀者
當自得之固無待乎予之張之也已

標亭詩集序

詩之為道也貴乎工而或即失於求工古之作者內有
忠孝之實而觸於事物以自寫其纏綿愷惻不能自己
之情不為綺靡不為險僻其味真其旨遠使夫讀之者
適如其意所欲出而極意擬之究無以臻乎其域此其

所為工也逞才炫博者不知其所由工而過求之於是
務為雕琢續飾鏤心鉅肝包天地孕古今舉昆蟲草木
之細瑣以及道釋仙鬼之迂且幻一切牢籠筆端洞觀
駭目若足以窮宇宙之至工顧詩之本不存焉其工也
誕耳浮耳葉河薩君魯望以內府郎典司啟事予侍直
禁廷每晨夕覲面於金鋪玉砌間限於職守未得通款
曲今年夏西郊直次出所為詩見示且索為序數請不
已受而讀之風神音節宛然名家善步趨唐音者莫之

或過至其感遭逢閱世故升沉聚散忻戚萬端可歌可泣語語從至性中流出非忠孝鬱於中而工於為言者能若是耶君給事之暇日事吟咏歲成巨帙駸駸進於古人正未可量乃即目前所作以視夫逞才炫博誕且浮者果孰為工耶夫不於詩乎求工此君之所以工也

陳月溪制義序

人秉天地之清氣以生而以其菁英發而為文則亦以至清者為足貴游之乎詩書之原所以養其清也惟陳

言之務去所以衛其清也古人為文之大端不外乎是制義文之一體耳而馳說者逞浮囂繁靡之音自詡淹茂矯之則又務為幽窈詭側艱深愴怵之辭而其弊為俚淺薄劣游談無根或汨之或滴之得全其清者蓋寡矣同年陳子所為制義沉思獨運而不失之滴詞條贍蔚而不失之汨讀之灑然蓋所謂能全其清者余嘗論之金與玉質之至清者也然而礦鍊之而始精璞攻之而始瑩若夫太虛無滓光景常新澄溪如練空明見底

是固造物者至清之氣也而仰之者曰有本挹之者曰有源然則讀陳子之文固當進而觀諸本源之所在而固以得其鎔冶之方攻錯之用將古人為文之道亦庶幾矣夫

徐亭玉制義序

宛平徐生以丙辰舉京兆鄉試文名籍甚丁巳南宮俛得而失會奉

詔旨選擇文理明通之士不循年格悉授學校官生名

在選中遂得新城教諭以去今年春生哀其文將授之梓以余嘗與選擇之役於生特為激賞因來請益乃得盡見生素所為文且以知其學日益富而文日益工為可喜也予嘗謂文章之與時命迭為勝負而未嘗不各伸其權始之遇而不遇也數也命為之也而文章之精華迄不可掩則雖不遇而自有可遇者在時命亦不能厄之終否此以知義命之可安而績學工文之不可以已也師儒之職日與生徒講切義理以文字為職業未

有已之不修而可以正人者生年甫及壯新發於硯苦心所鍊講肄學舍不過借為澤霧刷翰之資然以已所得力為諸生講授指畫而即以得失之已驗者俾諸生益相信於安命俟時之道將使來者奮興為文章有法度可觀而不為奇袤詭遇所動見者共知為徐君弟子生之舉其職也不既優乎黃涪翁有言文章如精金美玉自来即人語曰人定者勝生今試禮闈文章之伸其權而時命偶符行有日矣姑書以為券

寶坻縣志序

寶坻縣志不修者七十餘年矣吾鄉洪君以名進士宰斯邑咨詢掌故惟闕軼是虞蒐討綜覈因前志而筆削之緯以已意正其謬謬補其疎漏義例詳整釐然有條書成使來徵序予惟郡國有志乘上之朝則以供作史之採擇歲之官則以備從政之師資周官小史掌邦國之志外史掌四方之志鄭司農謂邦國之志春秋傳所謂鄭志國語所謂周書鄭康成謂四方之志若魯之春

秋晉之乘是也蓋先王彊理天下物土之宜而布其利
達其志而通其欲其事至纖至悉土均掌地政土訓掌
道地圖誦訓掌道方志保章氏以星土辨九州之地風
俗之美惡則大師大行人志之戶口之登耗則閭師閭
胥志之民之有德行道藝者族師黨正之屬志之計其
時蓋各為一書月要歲會以統於小史外史其貯之柱
下則謂之寶書三代之盛道德一而風教齊其道蓋由
於此後世幅員遼濶風氣異宜徵於書者尤急西漢計

書先上太史令其副白丞相東漢郡國志上於蘭臺至
學士大夫所纂輯若闕中之記華陽之志襄陽之傳三
輔九域十道之圖以及一方一邑之事列於經籍藝文
之目者前後相因體裁殊別要非姑曼衍而為此也畫
封圻審沿革條物產察民風表賢良撫故實可以語可
以道古可以酌今昔之宜可以籌教養之實守土之良
將以資圭臬焉夫昏夜有求於暗室之中非燭則何見
即鹿於山椒非虞則何以從禽若盡千里百里之域而

司牧之而惟以吏為師則所營不過刀筆筐篋之末而已矣洪君之汲汲於此豈惟以著述為能事求以度越前人其勤於官守而有見於三代盛時化民成俗之由也蓋良吏之所規畫遠矣君為政敏而達制府褒其治行薦擢磁州牧瀕行遄竣後乃去其用心如此故不辭而為之序

二十一史四譜序

古譜牒之作紀年別系具列世諡與記言記事之書相

輔而行太史公讀牒記黃帝以來皆有年數采為五帝本紀又以成三代世表十二諸侯年表桓君山謂旁行斜上蓋效周譜然則古譜牒雖不傳因史記表尚可考見自尚書春秋作而世紀晦史書盛而譜歷之學或幾乎息矣後世惟氏族之書承用其法專以別宗支聯子姓而名公鉅人則或為之年譜以志其生平出處之概好事者乃并花葩果實種類之同異器什玩好之微一譜之而其與正史相表裏者顧莫之尚夫紀傳文贍

而事周書志詞核而義博作者得以暢其旨雖工拙異
數未嘗不震發於人耳目間至譜牒則條具而件繫之
不得馳騁其說著為怪奇偉麗之觀其闇而不章甚且
嗤為無用也則宜然上下千百年間臚舉其人若事本
末相授有條不紊雖庶宗別子派衍而末益分以迨夫
遠絕不可知之數而沿流討源一舉目而可得其得姓
受氏之始衣冠族屬之詳此固著作之家所不可廢而
非嗜古之篤用心與力之勤固不足以知之而且從而

好之也歸安沈子寅馭來京師示其所著廿一史四譜
曰紀元曰封爵曰宰執曰諡法其體蓋出於表歷之流
而變其旁行斜上者為標目舉帝紀之要撮世家列傳
載紀之綱而類別區分則合於書志會萃羣言之法其
紀元以大一統為正而割據僭亂附焉為得涑水紫陽
之道義諡法博考紀傳又以補夾漈鄱陽之未逮約而
不漏簡而該諸史之義例畧備矣夫史以紀成敗考見
得失而儒者斷其義不務綜其始終詞人學士但取奇

麗可喜之文以資誦習條貫淹通者千百人不得一人能網羅包并自為一書者數十百年而一見也又況譜牒之學荒絕而莫之好者乎沈子以余承乏史局來問序且出其所為新舊唐書合鈔蓋致力於是者廿餘年而復以其餘輯成四譜其用心與力之勤必有得於古作者之精意余將從而問焉以求無戾於前史其無恡於諗余哉

五代詩話序

國朝詩人以新城王先生為大家所審定如唐人選唐詩古詩選萬首絕句選之類與其所為說部諸書若居易錄池北偶談分甘餘話凡言詩之書甚衆皆行於世其未刻而藏於家者尚有手輯五代詩話一帙自唐天祐後至宋興止可資搜採者皆在族子某恐其久而湮沒也謀壽之梓而問序於余余登朝晚不及見先生顧喜讀先生書因不敢辭蓋唐人重聲韻之學二百餘年間士人之心力皆萃於此故耳濡目染綿邈弘長雖處

雲擾波靡之時片語單詞可供吟諷猶有永平遺風今夫白日之西匿必有餘暉大木之就頽必有旁蘖雖其蒼涼蕭瑟不足自振要固有不可磨滅者焉此亦五朝六姓諸僭國文事之遺也然非先生之抗懷慕古旁覽博辨多識而約取之安能以有傳昔歐陽子修五代史謂其時賢才皆伏匿不出數十年茫無一人於一行傳痛乎其言之今觀此書所採摭如羅隱之介潘佑之忠徐鉉之博雅桑維翰王樸之智畧使其雍容於隆盛之

世其懷文抱質亦足彪炳一時矣士有遇不遇可以觀世變焉則先生之所尚又豈獨談藝之資而已乎

斷憲彙編序

古之學者務實用而貴專精其臨文則以達己意足該乎物之理而止無有籠絡羣言以資鋪陳排比之用者至晉宋以還漸趨支蔓非博引以張之縟辭以飾之則不足以自振而人之材力又不能盡攬羣言而擷其芳潤也而類書乃自是起今所傳如杜公瞻之編珠虞世

南之書鈔徐堅之初學記實其濫觴之源踵事者至不可勝舉雖亦搜羅經史百氏然章採句摘不精不詳承學之士事其末而忘其原精神日益紛根柢日益淺以古之說繩之眉山氏所謂文章日益工而道將散矣興國周君履旋所輯斷窻彙編者其書亦沿類書之體顧獨詳言人事蓋人有生而後有形有形而後有倫物有倫物則有善否顯晦之別酬酢發揮之業而其中又有可以勉而致與莫之為而為之分此人生之大致也是

書皆掇其往蹟以類相從予一再詳之而知其意遠矣
易言君子以多識前言往行以畜其德詩毛傳亦言君
子有九能可以為卿大夫然則古人之探討古今非徒
供漁獵攀悅之具將有以用之也君之為是編也例精
而帙富凡可法誠之事咸具臨文既有取資即其事而
鏡之於行習之間可以相益吾意即起古專門名家者
而視之亦在所不棄爰為之序以申之

類書穀玉序

康熙丁亥余受業於族叔父今魏先生之門見先生手
輯類書穀玉一編州次部居已褻然數十帙後先生客
授於歲書家益肆蒐採焚膏宿火寒暑弗輟閱數十年
書成而先生捐館舍先生之子樸園將付之梓寓書索
余序類書自唐初學記白帖諸書而後沿例撰次無慮
數十百種顧哀輯之難約有二端見聞不廣搜羅不富
裨販叢殘一嚮之味不足朶既飽之願一溢之米詎能
果甚枵之腹比陋而不足備用也誇多鬬靡詭異錯出

猩脣獾炙無關日用之需土飯塵羹并失飲食之正此
駁而不可為訓也先生之書綜古今括宇宙七略之所
序四庫之所標無不繁徵遠引取多而用宏及觀其大
指擇言必馴取材必正以經史為根柢以子集為條肄
以人事為經緯以物象為繪繡則又寓別裁於編纂之
中具有精義寒儉者得之固不啻療饑之菽粟也即淹
博者亦將以是為珠槃玉敦之陳不與瓦缶竝薦語曰
豐年玉儉年穀觀先生所以名書之意而可識已嗚呼

古學之荒久矣操觚家徒挾其呬唔佔畢之具以冀一日之弋獲視讀書繼言為無當而才智者率泛濫於叢編脞史稗官小說以矜一得之奇其於源流正變雅鄭區分未有聞也先生以老諸生窮年矻矻未嘗以儲峙既富輟討索之勤卹卹乎不稍假易推先生之意以學殖不可不克指歸不可不正而拘墟與橫鶩胥失也或有謂類書出而學者不復見全書此則先生不任其咎也具膏梁者弗禁其事畋漁炊珠桂者奚妨其勤樹藝

在學者善會之而已矣憶昔從先生時先生年及艾矣
猶自課六經四子書秦漢八家之文歲背誦一周平生
著述未及問世而是編實足以嘉惠來學因樸園之請
用推闡先生名書之意以告世之人使知為學宗旨在
博而能精亦藉以自勵也

古淳禪師語錄序

古公與吾師昆明王永齋先生同鄉嘗從先生游雍正
甲辰春余識古公於先生座上風神邁遠無塵埃氣知

先生所與游非凡俗流輩也明年先生葺景忠庵俾師
駐錫景忠庵在法源寺西前侍御趙公遇國變殉難葬
其地因闢小庵護視之滇人官京師者歲一再會老屋
數椽年久且圯先生稍增葺之師攜一童一叟支折脚
鐺鍵戶終日余時歛門晤語藥爐經卷斗室寂寥深樹
禽聲與鄰寺粥鼓相應翛然有出塵想丁未秋先生沒
師視其喪為有終始於是屏居庵中者且十年有終焉
之志予以是高之歲乙卯和碩莊親王奉

命推擇者宿入萬善殿教習內府沙彌師首受教出入
露寒鳩鵲之間為方外榮選師處之晏如逾三年莊親
王憫其勞令住持南海子萬壽寺寺

世祖章皇帝所建寶鼎在焉

天子春秋蒐狩數過其地主僧得瞻仰

天表扈蹕公卿多就師叩問大司成鄂公昆仲尤契間
相與酬唱予見師意氣視居景忠庵無少異以是益心
重之又三年以老力辭王令居靜室自顧養無何廣通

寺缺主席者王重其選謂師年德相副奏准入院師故
深於禪悟至是以所得提唱來學開堂打七傳演毘尼
法宏闡宗風一出以本色大衆嗟服余入直 西苑道
所必經牽於職事僅一再至今年三月造丈室師方擁
破衲枯坐蓋其時已示微疾矣曩予通籍久未生子戊
申夏長既在娠師曰必丈夫子也當為吾弟子明年正
月果生沆因踐其諾師示寂其徒奉語錄求序予未為
宗門學而與師游最久素重師前後廿餘年所處境豐

約不一未嘗毫髮動其中此賢士大夫所難能者師視
為固然無幾微矜持意則師之所得可知也已欲知師
者其有味於予言

趙雲崧甌北初集序

余主庚午京闈得一五經卷才氣超軼兼數人之長二
場所擬詔誥復極典雅心知為才士亟取入解額及榜
發則陽湖趙生雲崧也謁見時布衣徒步英氣逼人目
光爛爛如巖下電叩其所學自秦漢以來詩古文源流

已皆窺涉津奧遂延課兩兒子余筆墨填委時間亦屬
具草初猶遲跣才不就繩檢繼乃益肆力於古嘗見
其閱前人集一過輒不復省視然其中真氣息真境地
已無不洞燭底蘊間出一語評騭輒如鐵鑄覆按之卒
無以易也以是所見愈擴每數日輒獲一進境昔人所
云三日刮目殆無以過之已而官中書舍人入直樞要
詔命奏劄援筆立就無不中窾會余深倚其攸助然生
不自以為能退直之下益沉思旁訊以古作者自期嘗

一月中作古文三十餘篇篇各仿一家示余余為指其派系所自生輒以為不謬每相視而笑計自庚午冬客余邸至今七八年其所進有他人數十年功力所不能及者余所閱天下士多矣若其心悟神解舍筏登岸則未有如生之捷且易者也茲哀輯其數年所作詩為甌北初集乞余弁其簡首昔歐陽公一見蘇子瞻即許以出一頭地度其時坡公所挾不過如今所傳初發嘉州諸什非有後來奇恣橫絕之觀然已傾倒若是蓋珠光

劍氣一見自有不能掩者生以數年即足勝人數十年
功力英年召發來日方長勿輟其勤勿滿其志吾安能
測其所至哉余孱劣豈敢以廬陵自命而生之取益多
師累進益上則正未可限他日才益老學益厚萬斛之
泉不擇地湧出行將卓然成不朽業如陳後山所云一
代蘇長公四海名不已者此集獨特其初發嘉州時也

丁茜園集序

芝栢博敞書生夢鳥之樓藻井陰岑高士聽鸛之館閒

吟倚檻四山撲斫以排青清嘯聞天萬瓦浮烟而滄白
此焉立雪曾分藜照餘光通者餞春復與櫻厨雅會乃
有丁先生茜園者橫寥絳帳經傳戴聖齋中高寄元亭
句贈汪倫潭上更揆秘衍滿貯雕文時散綰繩紛披勝
錄如開武庫森森鸛鵲之刀恍入郇厨片片鱗虬之脯
饗餐與白龜竝蝕摩抄百斛龍文天吳偕紫鳳俱攢綵
縑十番鳥綬洵可謂笙簧藝苑藻績詞林者矣屬陪揮
麈之餘獨暢然犀之識謂夫運開東壁家富緹緗客到

西泠羣推騷雅兩峯庵霽差供學士之硯山三浙泲洋
未喻文人之墨海然而小巫氣索大雅云衰試為覲陳
原其流弊大抵玉徽金銑匪諧田父之謳霧縠冰紈未
入裸民之目客慚織室常逢麤服亂頭人異柳津翻欲
上章驅鬼是則耳熟鍾嶸之三品目昧惠子之五車文
異水而何波筆非花而奚燦雖令易牙負鼎難調明水
以為羹師曠鳴球亦拊敗埏而無韻或者拾人牙慧掩
我腹枵李記室之襴襦酷遭同館沈隱侯之文體每值

偷兒不知閨苑千枝不綴前春之辦赤城十丈詎烘昨日之霞今使毗隸鶉衣劣得興公白地禿妻蟬鬢截來李妹青絲不稱體裁唯資嗔噓又或徒工懶祭那解蛟騰畧類疥駝體以伏而無媚聚來白雀貫以朽而難攜邢子才思讀悞書原無奧義莽大夫遐搜奇字不過方言自詫艱深終淪平鈍且夫史公憤激遇壯節而淋漓蒙叟詆諧借寓言而恣肆汎渤澥者有粘天盪日之觀陟天台者攬倒景匿峯之勝若第雕冰鏤雪矜騷客之

曼聲弄月吟風託達人之高致候蟲軋軋祇應伏衰草
而哀吟兒女喁喁乍可向小窻而細語洗茲陋習乃號
名家問作者之為誰恨古人不見我僕也對雄文而駭
矚聆高論而爽心忽起狐疑不辭蠡測何則銅龍窳窳
正聲華輻湊之區金馬逶迤亦筆札焱飛之地宮臨碣
石挾瑟者千人閣啟平津影纓者百輩以茲偉製際此
隆時踴蹕枚馬之班揖讓應劉之次炊金饌玉定多黼
芾之猷繪日挾天彌覺文章之貴云胡不可而顧如斯

矧有侯芭欲睽翩乎逢掖仰希楊意推著作于承明是
宜索縷管以長驅冀得對觚稜而愜適先生則辭茲繡
虎目笑文犧好語桓公莫薦巴西之譙秀希踪叔夜絕
交潁水之山濤隱約牆東寧伍東方而執戟棲遲研北
休瞻壯闕以上書甘屑屑於蟲魚謝翹翹於鵷鷺嗟乎
上車不落競獻凌雲入坐未驚疾馳望火誰云懷璧安
被褐以無言豈比垂綸老披裘而自若斯為達者無愧
勝流是用志厥冲襟率成儷語綺言郁郁既快覽於潘

辭玉屑霏霏憶備聞夫樂旨敢謂士安作序誇傑構于
太冲庶幾子建定文述美談于敬禮云爾

悟齋無題詩序

悟齋天上石麟風前玉樹篇盈芍藥風富清才筆架珊
瑚偶拈綺語有情獨笑庭開稱意之花無事恒啼樹繞
相思之鳥因寄所托顏曰無題闌以烏絲猗歟美矣僕
以西湖之客子濫充東閣之生徒柳絮飄時隨侍扶風
之帳槐陰合處就停海澱之裝獲此一編于焉三復夫

其才情俊逸思致纏綿既玉管之調心亦銅丸之脫手
固已極雅人之深致擅名士之風流然而境異楚湘感
殊洛浦隱囊坐褥儼若神仙金雀翠翹居然佳麗假使
簾前蠲忿定押靈犀如其杯底合歡無勞鵲腦而乃綠
牕晝靜效貞女之懷春翠袖天寒嗟美人之遲暮意者
乘車金市人言洗馬之工愁不同薦枕陽臺客誚大夫
之好色參其微旨別有會心云耳

梅花百詠題詞

滄亭觀察黃海人豪文穆後裔卓犖則名材拔地豫章
之樹千尋瓌奇則修幹凌雲建木之標十丈盤根錯節
早歷試以皆宜擢頴摘華即閒吟而入妙錦囊攜處絢
綺樹以千林瑤簡傳來得梅花之百咏爾其神思鬱勃
寄託遙深鄧尉烟霞橫飛紙上羅浮風雨交集毫端暮
綽約之精神突過何郎東閣寫輕明之格韻還如和靖
西湖縹緲寒香片片衆香國裏玲瓏暝玉枝枝羣玉山
頭點筆神來極歌舞淋漓之致轉丸工絕盡森疎瀟灑

之奇宋廣平鐵心石腸翻研綺語蘇和仲冰肌玉骨雅
擅妍詞洗淨鉛華已風情之盡占閒教冷淡看神影之
俱清乃知兀傲凌寒迴軼塵埃之表豈有娉婷弄月終
淪寂寞之濱此澗畔冰霜欲壯乾坤之氣節而枝頭雨
露能回宇宙之春和非惟體物以稱工斯乃言情之最
切者也僕高吟數過如贈一枝牽我夢於江南水邊林
下想君懷於薊北屏裏尊前不獨采芷搴蘭香草補左
徒之闕畧定識和羹荐實芳筵揚祖德之清芬

松泉集卷九

